

9.
vnd nicht zu verschweigen / wie ich also weiter in tieffe Gedancken ges
riethe / vnd mich selbst verwunderte / wie solche gewaltige Potentaten
vnd Herren / als welche Beschützer des Teutschen Reichs seyn sollen /
solche gefährliche Rathschläge wider die Christenheit hielten / kam mir
vor: vnd fiel mir eyn / der 2. Psal. Davids: H E R R / warumb toben die
Hayden / vnd die Leuth reden so vergeblich. Die Könige im Lande leh
nen sich auff / vnd die Herren Rathschlagen mit einander wider den
H E R R vnd seinen Christum / den Gesalbten. Vnd in dem wachte ich
auff / vnd ward an meinem Leib / vnd allen meinen Gliedern so matt / dz
ich darüber schier in Ohnmacht gefallen were. Wie ich mich aber etwz
recolligiret / vnd zu mir selber kam / da thäte ich mein Gebett zu G O T T /
meinem H E R R E N / seuffzete / flehet vnd bath: Ach Gott mein H E R R
wie kom ich armer Knecht doch zu diesen wunderlichen / vnd mir so gar
vnbekanten Dingen / die mir Eynfältigen viel zu hoch / vnd unbegreif
lich seyn / Ach mein Gott vnd mein H E R R / ist's möglich / so benimme mir
solche seltsame Gedancken / vnd errette mich hiervon / vmb deines aller
liebsten Sohns Jesu Christi / meines Erlösers / Heylandes vñ Selig
machers Willen / Amen.

Das diß Gesichte mir Paul Gräbner vorkomen / vnd des Nachts
von mir wahrhaftig gesehen worden / ist die Wahrheit / das will ich mit
meinem Herzen vnd Gewissen / H E R R G O T T zu dir im Himmel / dem
niemand lügen soll noch kan / bezeugt haben / vnd bekenne / wie ich (Gott
weiß) in meinem Herzen also gezwungen worden / solches seiner bedeu
tung nach / zu beschreiben / vnd weiß nicht / wie mir geschehen / wann mir
solche Prophecey eyngefallen / dann daß ich gar vmbgeben / vnd gleich
wie mit einem Blitz vmbteuchtet worden / welches nicht zu einem / son
dern zu viel mahlen von Tag zu Tag mir eyngegeben worden / vnd saget
mir mein Herz anders nicht / dann als solte es ein verwunderung aller
höchsten Herren der Welt / vnd darnach aller Menschen seyn. Ich a
ber für mein Person: bin deren Ding vnerfahren / vnd dessen Verstand
mir zu hoch. Bitte aber alle Gelährte / Weltweise / Schrift erfahrene /
vnd Gottsförchtigen wollen hier selber / diese Ding nach ihrem hohen
Verstand erwegen / dem nach sinnen vnd beherzigen / vnd mich in keine
argen verdennen.

D

Die